

天支地干

支干者，因五行而立之。昔軒轅之時，大撓之所制也。蔡邕《月令章句》云：「大撓採五行之情，占斗機北斗七星第三星，名天璣。璣，亦寫作機。亦泛指北斗所建也。」始作甲乙以名日，謂之干；作子丑以名月，謂之支。有事於天，則用日；有事於地，則用辰。陰陽之別，故有支干名也。

干支既相配成用，如樹木之有支條莖幹，共為樹體。又干者，干濟為義；支者，支任為義。以此日辰，任濟萬事，故云支干。又干，如物之在竿上，能豎立顯然。

《詩緯推度災》云：「甲者，押也，春則開也，冬則闔也。」乙者，軋也。春時萬物皆解，孚甲草木種子分裂發芽自抽軋而出也。丙者，柄也。物之生長，各執其柄。鄭玄云：「丙者，炳也。夏時萬物強大，炳然著見也。」丁者，亭也。

亭，猶止也。物之生長，將應止也。戊者，買也。生長既極，極則應成買易前體也。己者，紀也。物既始成，有條紀也。鄭玄云：「戊之言茂也，己之言起也。謂萬物皆枝葉茂盛，其含秀者抑屈而起也。」庚者，更也。辛者，新也。謂萬物成代，改更復新也。鄭玄云：「謂萬物皆肅然改更，秀實新成也。」壬者，任也。癸者，揆也。陰任於陽，揆然萌芽於物也。鄭玄云：「時維偃藏，萬物懷任於下，揆然萌芽也。」

子者，孳也。陽氣既動，萬物孳萌。《三禮義宗》云：「陽氣至，孳養生。」丑者，紐也。紐者，繫也。續萌而繫長也，故曰孳萌於子，紐牙於丑。《三禮義宗》云：「言居終始之際，故以紐結為名。」寅者，移也。亦云引也，物牙稍吐，引而申之，移出於地也。《淮南子》云：「寅，蟻萌動動生也。」卯者，冒也。物生長大，覆冒於地也。《三禮義宗》云：「卯音有，茂也。陽氣至此，物生滋茂。」辰者，震也。震動奮迅，去其故體也。《三禮義宗》云：「此月之時，物盡震動而長。」巳者，已也，故體洗去，於是已竟也。《三禮義宗》云：「巳，起也。物至此時，皆畢盡而起。」午者，倅陰氣午逆陽，冒地而出也。亦云萼也。仲夏之月，萬物盛大，枝柯萼布於午。《三禮義宗》云：「倅，長也，大也。明物皆長大也。」未者，昧也。陰氣已長，萬物稍衰，體蔓昧隱晦不明貌也。故曰蔓昧於未。《淮南子》云：「未，味也。」《三禮義宗》云：「時物向成，皆有氣味。」申者，伸也。伸，猶引也、長也、衰老引長。《三禮義宗》云：

「申者，身也。物皆身體成就也。」酉者，老也，亦云熟也。萬物老極而成熟也。戌者，滅也、殺也。九月殺極，物皆滅也。《三禮義宗》云：「此時物衰滅也。」亥者，核也、闕也。十月閉藏，萬物皆入核闕。《三禮義宗》云：「亥，効也。」言陰氣効殺萬物也。

干不獨立，支不虛設，要須配合，以定歲月日時而用。如君臣、夫婦，必配合以相成。從甲至癸，為陽，為干，為日。從寅至丑，為陰，為支，為辰。

別而言之，干則甲丙戊庚壬為陽，乙丁己辛癸為陰。支則寅辰午申戌子為陽，卯巳未酉亥丑為陰。陽則為剛、君、夫、上、外、表、動、進、起、仰、前、左、德、施、開。陰則為柔、臣、妻、妾、財、下、內、裏、止、退、伏、俯、後、右、刑、藏、閉。陰陽所擬，例多且略，大綱如此。

甲乙寅卯，木也，位在東方。丙丁巳午，火也，位在南方。戊己辰戌丑未，土也，位在中央，分王四季，寄治丙丁。庚辛申酉，金也，位在西方。壬癸亥子，水也，位在北方。甲為干首，子為支初，相配者，太陽之氣，動於黃泉之下，在建子之月，黃鐘之律，為氣之源，在子，故以子為先，萬物湊出。

用甲子相配，為六旬之始。干既有十，支有十二，輪轉相配，終於癸亥，故有六十日，十日一旬，故有六旬。一千一支為一日者，三旬為一月，十二月為一歲，四時，時有三月，生殺之功，備遍十二支也。一歲合三百六十日者，六六三十六，六甲之數也。萬物庶類，吉凶之理，以此彰矣。

上配九星，下配九州者。其配人身，甲乙為頭，丙丁為胸脇，戊己為心腹，庚辛為股，壬癸為手足。則子為頭，丑亥為胸臂，寅戌為手，卯酉為腰脇，辰申為尻肱，巳未為脛，午為足。此皆初為首，末為足。配五藏也，干以甲乙為肝，丙丁為心，戊己為脾，庚辛為肺，壬癸為腎也。支以寅卯為肝，巳午為心，辰戌丑未為脾，申酉為肺，亥子為腎，此皆從五行配之。又干以甲乙為皮毛，丙丁為爪筋，戊己為肉，庚辛為骨，壬癸為血脈也。支以寅卯為皮毛，巳午為爪筋，辰戌丑未為肉，申酉為骨，亥子為血脈也。木生在地上，故為皮毛；火有猛毅，故為爪筋；土有持載，故以為肉；金性堅剛，故為骨；水本流潤，故是血脈。